

Bi dituenak, hiru nahi

Gaur apurtuko da Beloki eta Arretxeren arteko berdinketa: bi txapel ditu bakoitzak


Enekoitz Telleria / Donostia

EZ da lepo beteko, baina sarrera ona espero da gaur Donostiako Atano III.lean. 17:45ak inguruan hasiko da (Tele 5) Ruben Beloki eta Fernando Arretxeren arteko lehen Euskal Herriko buruz buruko txapelketako finala. Gaur irabazten duenak, bi finalisten arteko bina txapelko berdinketa apurtzeaz gain, Euskal Herriko buruz buruko lehenengo txapela jantziko du, eta palmaresa estreinatuko du.

95ean Inaxio Errandoneari eta iaz Patxi Eugiri irabazi zion buruz buruko finala Ruben Belokik. 94an Errandoneari eta 97an Aitor Elkorori Fernando Arretxek. Bi final jokatu eta biak irabazi ditu Burlatakoak, eta hiru final jokatu eta bi irabazi —Eugiren galdu zuen 96an— Luzaidekoak. Aurtengo txapelketan, finalerdietan sartu ziren biak lehian, eta Armendariz eta Nagore utzi zituzten kanpora, hurrenez hurren.

Ruben Beloki da gaurkoa irabazteko faborito nagusia. Uneotan, beste guztiak baino maila bat gorago dago. Arretxe, ordea, zauritutako piztia lez irtengo da kantxara. Txapela janzteko bere azken aukeretakoa bat da gaurkoa.

22:45etan Bergaran, Armendarizek eta Nagorek hirugarren eta laugarren postua izango dituzte jokoan.



Ruben Beloki eta Fernando Arretxe elkarrekin, joan den asteazkenean Atano III.lean egindako pilota aukeraketan.

Beloki-Arretxe
norgehiagokak
buruz burukoan

Lau aldiz jokatu dute elkarren kontra buruz buru Ruben Belokik eta Fernando Arretxek. Bi partidu ofizialak Belokik irabazi ditu, eta errebantxako beste biak Arretxek. Laurak emaitza berberekin amaitu dira: 22-12

1995-IV-25 Ogetan:

12-22 Belokik • Ahoa bete hortz utzi zituen Ruben Belokik Ogetara hurbildutakoak. Aurreko urteko txapeladuna 12 tantotan utzi zuen estutasun handirik gabe. Finalerdietako partidua zen. Txapela jantzi zuen Belokik urte horretan bertan —15 tantotan utzi zuen Inaxio Errandonea finalean—. Historiako txapeldun gazteena zen, 20 urterekin.

1995-VIII-8, Ogetan:

12-22 Arretxek • Errebantxako partidua antolatu zuten Andre Mari Zuriaren jaietan. Urtebetez egun mikatza izan zuen Belokik. 12-7 hasi zen irabazten, eta 22-12 galdu zuen. Ez zuen bere maila eman Belokik.


1998-5-17, Atano III.lean:

22-12 Belokik • Asegarce enpresaren adarreko finala jokatu zuten biek. Ez zen batere partidu txukuna irten. Sakez eta dejadaz atera zuen aurrera partidua Belokik. Hiru urte geroago —hainbat atsekaberen ostean— finalean sartzea lortu zuen berriro Ruben Belokik. Maitzaren 31n jokatu beharreko finala, azaroaren 22an jokatu zuten Belokik eta Eugik —Aspeko txapeldunak—. Burlatakoak jantzi zuen txapela iaz.

1998-VII-11, Labriten:

12-22 Arretxek • San Fermin jaietarako antolatu zuten errebantxa. Nagusitasun osoz, aise irabazi zuen Arretxek. 20-5 ere joan zen aurretik irabazlea, baina azken txanpan txukundu zuen partidua Belokik.

Euskal Herriko Lehen Mailako manomanista



lazkoaren berdintsua izango da

iritzia

MIKEL UNANUE • Belokiren botileroa

Arretxe manomanista da, defentsan ikusgarri aritzen da bi eskuekin eta postura guztiak menperatzen ditu. Eraso ere azkar egiten du, pilotari abiadura ematen dio eta dejadak ere ongi botatzen ditu. Ruben ez da Arretxe bezala moldatzen defentsan, baina kolpe handiagoa dauka. Eraso hobea. Hori ikusita, aurtengoa iazko finalaren berdintsua izango dela iruditzen zait. Belokik eramango du partiduen erritmoa, bera izango da dominatuko duena. Arretxe, defendatzen saiatuko da eta, ahal duenean, Beloki zirikatuko du. Belokik duen arriskua normalean baino presionatuago irtetea da. Presionatuta irten eta Arretxek aurrea hartzen badu markagailuan, litekeena da Rubenek tokia galdu eta dakiena ez jokatzea. Hori da daukagun beldurra. Jendeak ziurtzat ematen du Belokiren garaipena eta Arretxek 10 edo 12 egingo ote dituen ari da eztabaizatzen. Partidu bakarrera, edozer gauza gertatu liteke.

Hasierak garrantzi handia izango du

iritzia

MARTIN ALUSTIZA • Arretxeren botileroa

Beloki uneotan dagoen pilotari indartsuena da eta horretan oinarritzen du bere jokoa, indarrean eta sakean. Defentsa ikusgarriak ez dauka, baina ongi moldatzen da, airez batik bat. Fernandok ez dauka Rubenen kolpea, baina beste errekurtsio batzuk ditu. Ez naiz ausartzen defentsa onena daukala esaten, bain hor nonbait ibiliko da. Onena, hala ere, partidu handietan hazi egiten dela da. Hori ikusita, Rubenek dominatu beharko luke pilotatzean, baina Fernandok hasieran asmatu eta Ruben urduri samar jarriko balitz, gauzak alda daitezke. Ez da erraza. Buruz buru jokatzen duzunean, zeure burua ongi ikusi behar duzu, hasierako pilotazoak jo eta gozatzea gauza ederra izaten da. Zeure burua ondo ikusita, errazago botatzen dituzu dejadak eta gainerakoak. Beloki danba eta danba hasten bada, goiko losa jo eta jo hasten bada, oso zaila izango da hari irabaztea.